

1 TESALONIKA

Wimaamala

1 ¹Geka tauyai Paulo ma Sailasa ma Timoti omi leta to gilumiyahi taumi tu witumagana bolumi Tesalonika tuponana uyahimi, babana taumi Yaubada Amata ma ata Guyau Yesu Keliso hai gali u hinena o memae.

Hai lunugotootogo po hai nugodumola hina melabenimi.

Mi Tesalonika hai dewa hi haki duma

²Houga magomagouna i lupali uyahihi to imaamala Yaubada uyahina atapuma ubeimi. ³Ma houga magomagouna Yaubada Amata u matana to laupali ubeimi, babana omi witumaganagei o bagibagi imahi po omi lounugotootogoei lawa o haguhi po Guyau Yesu Keliso a paliwitumagana ubeimi o yamtaibagibagigeya.

⁴Walewalehiyai, to hanapugeya Yaubada i luhogalena dumami yaka i winaganimi po taumi a lawa. ⁵Hougana to lauguguya ega i baha awa ma, Alugo Woiyawa bahana i wikadidili uyahimi po bahana o witumaganeya. Tauyai i mae u hayami o galena tuhagaya. ⁶Uyahinei o witutupoganeiyai yaka gasi ata Guyau o itutupoganeyaya. Lolowa Yesu tuwegana o nonoli yaka witai o tuhagaya ma tamogi anai kaohami o wotagoya babana kaohana Alugo Woiyawa uyahinei i nei. ⁷Uyahinei taumi ani galena dewadewana Keliso tu witumaganena Masedoniya ma Giliki tupohihi uyahihi. ⁸Taumi uyahimiyai ata Guyau tuwegana amaka i nohaya mi Masedoniya po mi Giliki uyahihi, ma taumi gasi omi witumagana Yaubada uyahina tuwegana i nohaya tupo atapuhi uyahihi. Uyahinei tupo awai uyahina to nena ega emoemotana po bimiyei tona ibaabani, ⁹babana tauhi uyahiyai he ibaabani bimiyei hi pa, 'Lolowa o nena mi Tesalonika uyahihi po hi kaohena dumami po hai ani witumagana koyakoyama hi wihinigiyehi ma Yaubada uyahina hi palihalena mehi babana tauna tunawana Yaubada dumana po waiyautuna tauna uyahina hi nugobui po binei hi woobagibagi, ¹⁰po gasi Natuna hi ionaneya

houga awai apo yadei ina hopu mai'. Babana Yesu hilagei i witowolo meya apo yohola ina nei po Yaubada a uyogigai uyahinei ina halota.

Paulo a bagibagi Tesalonika u meyageina

2 ¹Walewalehiyai, o hanapugeya lolowa i witoumana uyahimi ega tota ibaabani yababa ma anai anona. ²O hanapugeiyai mi Pilipai hi wiapapoeniyai po to wihinimaya ma Yaubada i wikadidiliyai po tuwega dewadewana uyahimi to bahebaheya hawena wiyuwana to tuhagaya. ³Ma to lauguguya uyahimi ega tota koyakoyamemi gapola luhogalahi ubeihi ma tamogi baha dumana to ibaabaniyeya uyahimi. ⁴Babana Yaubada i kawaidewedeweiyei po bagibagi geka i palihaleya uyahiyai po ipa tuwega dewadewana to bahena geleteya uyahimi yaka i bagibagina ega ipa lawa to laikaohahi ma Yaubada to likaohaya, babana nugonugoyai hinena Yaubada i hanapugeya. ⁵Lolowa to nenehi uyahimi ega ipa i baha dagihagei ma nugonugomi to waya, ma tamogi Yaubada a baha dumadumaluhiyei to palipaliwelemi ma Yaubada i hanapugeya, ega tota kawakamone uyahimi po ipa omi gapola to tamihi, eega. ⁶Ma u matami po lawa gehouhi u matahi i dewa to dewadewahi ega ipa ona huneiyai.

⁷Tauyai Keliso a tu wituwituwega yaka emoemotiyai ipa uyahimi to taniwaga ma tamogi eega. Tauyai i dewa ipa to nugohegoya uyahimi po mei wawine natunatuna uyahihi e nugonugohegoya. ⁸To luhogalena dumami yaka to nugohalena meiyai uyahimi. I luhogala bimiyei ma Yaubada tuwegana anai kaokaoyai to paliwelemi ma tauyai gasi to palihalena meiyai uyahimi.

⁹Walewalehiyai, lolowa i bagibagi uyahimi amaka o galeiyai iyeta po ididibala to bagibagi kadidili duma po Yaubada tuwegana to ipaliweleneya uyahimi, ma tamogi tunawiyai i am to galena iteteya babana ega tota luhogaleya ipa to ligenomi i am galena itetena binei.

¹⁰Taumi i dewa u hayami amaka o hanapugeya ma Yaubada gasi i hanapugeya i dewa to wiwoiyawehi po hi dumalu po hi haki wahaga. ¹¹Babana atapumina to gagalena itetemi mei lawa natunatuna e gagalena itetehi, ¹²ma to wiututu lulougo uyahimi po to wikadidilimi ma to paliwelemi ipa ona dewa imahi babana Yaubada i inaganimi tauna anani taniwaga po a wasawasa binei.

¹³Houga magomagouna Yaubada uyahina to imaamala, babana Yaubada a baha o nonoli po uyahina o palihalena memi babana tauyai ega i baha ma naka Yaubada a baha. Uyahinei o witumaganeya po a wipoya o tuhagaya. ¹⁴Walewalehiyai, mae witewiteihi amaka o tuhagahi naka pitenana gasi tauhi Yesu Keliso a bolu gehouhi Yudeya tuponana uyahina. Tauhi witai he tutuhagahi hai dobu lawahi uyahihiyei, mei taumi witai o tutuhagaya taumi omi dobu lawahi uyahihiyei. ¹⁵Geka dewana mi

Yudeya hai dewa dumana, uyahinei ata Guyau Yesu hi lihilageni, ma tu bahapiko odubohi hi ununihi ma tauyai gasi hi wigawiyeyiai uyahinei Yaubada ega ita kaoha matababana lawa magomagouhi he ihinigigiyehi. ¹⁶Mei gasi i wipaliwelena taumi ega mi Yudeya uyahimi, he iletami ipa iyowai ma hina lugudumi babana ega nugonugohi ipa Yaubada ina wiluyawahimi. Uyahinei apapoe i lihogo dumahi yaka Yaubada a uyogigai amaka hi wialoni.

Paulo i luhogaleya ipa ina weludadana mehi

¹⁷Walewalehiyai, lolowa to nenehalemi to nugodubu duma babana ega houga gehouna tota galemi, ma yohola to nugonugotuhumi ega tota winugoguluwimi, uyahinei ma to iletai ipa iyowai ma to nehi po to galena memi. ¹⁸I luhogala ipa to nehi uyahimi. Tau Paulo a wileta duma ipa a nehi po a weludadanimi, ma houga magomagouna a iletai po ega emoemotau, babana Tomodulele u tahaya i guduya. ¹⁹Guyau Yesu a houga gunawilana uyahina, taumi bimiyei apo kaoha to wialoni babana omi witumagana binei apo meiha diidigana to tuhagaya. ²⁰Uyahinei taumi i ani wotalagae ma i ani kaoha.

3 ¹Hougana u Ateni a memae, ma a winugowilawila duma bimiyei, po ega yaka a baha a pa, nugote Timoti a himili po ina nae Tesalonika ma tau tunawau geke hota a memae. ²Ega yaka walehita Timoti a himili po i nehi, babana tauna Yaubada a tu bagibagi, Keliso tuwegana uyahinei ipa ina wikadidilimi po Keliso uyahina ona witumagana imahi ³po geke witeihi uyahihi ega ona tapitapiya. Witeihi amaka o hanapugehi naka ta tutuhagahi. ⁴Babana lolowa ta memegogona ma to bahebahena nonogogeya to pa, 'Pilipili uyahimi apo hina geleta'; ee, geke hougahi amaka he gelegeleta. ⁵Naka binei ma a inugowilawila babana a matouta duma Tomodulele uyahina meka po apo ludadana baneina ina welewelemi po ona tapiya po lolowa i bagibagi uyahimi ina wiapapoeya. Uyahinei Timoti a himiliyahi po ipa omi witumagana ina galeya ma tuwegami ina neiyai uyahiu.

⁶Timoti i nehi uyahimi ma i gunawileya po tuwegami i paliweleu i pa, 'Mi Tesalonika Keliso hi witumaganena dumaya po hi luhogalena imahiyeya, ma lolowa ata toumana uyahihi houga magomagouna anai kaohahi he nugonugotuhuya ma hi luhogaleya ipa hina galena mem'. Tau gasi u luhogala ipa a galena memi. ⁷Walewalehiu, omi witumagana binei, tuwegami a noonoli po i likaoha dumau po ega mei pilipili po witai u hinena a memae. ⁸Uyahinei omi towolo momota Guyau binei u ani kaoha. ⁹Yaka i omhuna Yaubada uyahina i kokoe babana u kaoha bimiyei i lata duma Yaubada u matana. ¹⁰Uyahinei ma iyeta po ididibala a laupali kadidili ipa iyowai ma tepami a galena mehi po apo tu witumagana tapitapiya omi ututu a lawi po ona kadidili.

¹¹ Yaka geka i lupali ipa Yaubada Amata ma ata Guyau Yesu i tahaya hina hoeya yaka apo to nehi uyahimi. ¹² Ma Guyau a luhogalagei ina ligoholimi po tunawami ona lauhogalena memi po lawa gehouhi ona luhogalehi po mei tauyai to lauhogalemi pite, ¹³ po meka hougana ata Guyau Yesu tu wiwoiyawena mitehi hina hopuhopu mai taumi anai nugokadidilimi po anai nugoyeueumi po anai woiyawami Yaubada Amata u matana ona towolo geleta.

Yaubada dewa dewadewana i luhogaleya

4 ¹ Walewalehiyai, geka ginouli waimulina, lolowa dewa to iatatiyemi ipa Yaubada ona likaohaya po geka hougahi amaka o wootagohi yaka ega ona wohouna ma ipa Guyau Yesu binei ona dewadewa gawahi.

² Ma ata Guyau Yesu a taniwaga amaka a welemi po o hanapugehi.

³ Yaubada a nugotuhugei ipa omi mae hina wiwoiyawa ma ega matamaga a tupo uyahina ona nena. ⁴ Ma emosi po emosi ona tawitawine omi dewa dewadewahi po dumadumaluhu uyahihieyi.

⁵ Ma ega ipa anai luhogala gobugobumi po mei lawa ega Yaubada hita hanahanapugeya. ⁶ Ma ega lawa gehouhi agagohi ona halohalohi meka po apo Guyau a wimeiha ona tuhagaya. Geka ginoulihi ubeihi lolowa a baha kadidili uyahimi. ⁷ Matababana geegeka, Yaubada i inaganita ega dewa gobugobuhi ubeihi ma dewa waiwoyawahi ubeihi. ⁸ Uyahinei apo iyai lugagayo geka ina wihinigiyeyea naka ega lawa hai lugagayo ita ihinigiyeyea ma Yaubada a lugagayo e ihinigiyeyea, ma Yaubadana Alugo Woiyawa e weleweleta.

⁹ Ma apega luhogala binei an'omgiluma nehi, babana Yaubada tauna amaka i wiatiyemi po emosi po emosi o lauhogalena memi. ¹⁰ Naka pite gasi walewalehita tupo Masedoniya u hinena amaka o lauhogalehi uyahinei ma a laihunami ipa omi luhogalana gawagawata.

¹¹ Ma ona wileta po anai nugodumolami ona memae po tunawami omi bagibagi nimamiyei ona dewadewahi ma ega lawa hai bagibagi ona iyaltugehi mei lolowa a palipaliwelemi pite. ¹² Uyahinei taumi omi mae binei ega lawa gehouhi uyahihhi ona lauwahala yaka apo tu meuputa hina wiyateyatem.

Guyau a gunawilana binei

¹³ Walewalehiu, ega ona inugoneina tu hilahilage ubeihi. Uyahinei apo tulata awai ina hilahilage ega ona nugonugodubu дума po mei tauhi ega hai witumagana towolo meme uyahina. ¹⁴ Ma tauta Yesu ta witumaganeya naka hilage uyahinei i towolo meme, po Yaubada ta witumaganeya ata lawa tu nugobui hi hilahilage apo Yesu mitehi ina weluwinihi. ¹⁵ Geka ata Guyau a baha to ipaliweleneya uyahimi, apo a houga gunawilana uyahina tauhi tu hilahilage apo Keliso hina tuhaga

tahaeya ma tauta a yaututa apo ta wimuli. ¹⁶Guyau Yesu ponana apo ina lata po ina hopuhopu mai, tu winoyanoya mi yadena hai tu weluweluwai ponana apo ina lata ma ina iototu po Yaubada a himogo apo hina huweni po gololona ina lata duma. Ma Guyau yada uyahinei ina hopuhopu mai ma tu hilahilage lolowa Keliso hi itumaganeya apo hina towolo meme. ¹⁷Apoma tauta a yaututa hoi hipuli ta memae mitehi ta gae hoi yada po ata Guyau mitehi ta witutuhaga yaloi uyahihi po tauna mitehi ta mewahaga. ¹⁸Tuwega geka ona deedeaya tu nugodubu emosi po emosi u hayami, ani likaohami.

5 ¹Walewalehiu, ega emoemotana po geka omi letana uyahina Keliso a houga nei a paliwelemi po ona hanapugeya, ²babana a houga nei ega iyai gehouna ita hanapugeya. Guyau a nei galenana mei tu danene uguwa bolinai apo ina nei po ina ligoholita. ³Apo lawa hina pa, 'Houga dewadewa amaka i geleta', po anai kaohahi hina memae, ma naka houkana wiyuwa baneina apo ina laigoholihi mei wawine a houga wigunaguna houkana. Uyahinei wiyuwa naka ega emoemotahi po hina lowo haleya.

⁴Ma walewalehiu, taumi uguwa a tupo uyahina ega ota memae yaka wiyuwa houkana apega ina ligoholimi po ona matouta. ⁵Babana tauta yayata tu miyena yaka ipa yayatagei ta nena, ma ega uguwa dewana uyahinei ta nena. ⁶Uyahinei ega ipa ta lauhinibegabega po mei lawa boluhi he lauhinibegabega pite, ma ipa Yesu tana ionaneya nugonugota anai dumadumaluhi. ⁷Ma tauta ega ipa mei tu matagiba, po goila kadikadidilina tu umaumahi tauhi uguwa dewahi tu bagibagiyehi. ⁸Ma tauta nugonugota hi laugiigilihi ta galena itete meta, po ata witumagana ma ata luhogala uyahihiyei nugonugota tu wigawiyena ta guduguduya po Yaubada a paliwitumaganana ata luyagohana binei ata nugotuhu ta lugaagalihi. ⁹Babana Yaubada ega ita winaganita a uyogigai iyetana binei, ma ipa ata Guyau Yesu Keliso a luyagohana ta waya. ¹⁰Naka tepanei Keliso i hilage ubeita, uyahinei apo hilahilage bo a yaututa apo tauna mitehi ta mewahaga. ¹¹Uyahinei emosi po emosi ona ikadidili memi po ona haguha memi mei amaka o dewadewahi pite.

Guguya anani kokoe

¹²⁻¹³Walewalehiyai, to lupaliyemi ipa omi tanitaniwaga ona wiyateyatehi po ona luhogalena dumahi, babana Guyau a bagibagi he dewadewaya uyahimi he iututu lulougo ma he gagalena itetemi. Uyahinei ega ona itona ma nugodumola uyahina ona memae.

¹⁴Walewalehiyai, to laihunahunami ipa tu luupudoodola ona baha kadidili uyahihi ma tu lowolowo ona winugokadidilihi, ma tu tapitapiya ona haguhi, ma lawa atapuhi ubeihi omtaibagibagei ona wobagibagi.

¹⁵Apo iyai ina iapapoenimi ega ona imiheyaya ma houga magomagouna

ona lauhogala po ona ihaguhagu. Omi lawa dumahi po lawa gehouhi ona haguhaguhi.

¹⁶Houga magomagouna ona kaokaoha. ¹⁷Ma houga magomagouna ona laupali Yaubada uyahina. ¹⁸Ginouli atapuhi ubeihi Yaubada uyahina ona imaamala, babana dewa geka pitenana Yaubada a nugotuhu tauta Yesu Keliso a bolu ubeita.

¹⁹Ma Alugo Woiyawa a bagibagi uyahimi ega ona bohobohoya. ²⁰Apo lawa gehouna Yaubada a nugotuhugei ina bahabaha piko ega ona ihinigigiyeya. ²¹Ma a wiatatianana ona ludadani po ina dewadewa yaka ona wotagoya. ²²Ma apapoe atapuhi ona wihinigiyehi.

²³Nugonugou ipa Yaubada a nugodewagei ina liyeuyeumi po ona palihalena memi u nimana uyahinei apo alugomi po nugonugomi po hinimi ina galena itetehi po ega apapoe ona tutuhagaya a siga Yesu Keliso ina gunawilena meya. ²⁴Geka binei ma Yaubada i otugemi, tauna Tu dumalu yaka awai i bahebaheya apo ina dewaya uyahimi.

²⁵Walewalehiu, Yaubada uyahina ona laupali ubeiyai. ²⁶Ma i wimaamala walewalehita atapuhi i winiuyagona waiwoiyawana uyahinei. ²⁷Yaubada gowanei a lupaliyemi ipa geka letana walewalehita atapuhi u matahi ona hiyaw. ²⁸Ata Guyau Yesu Keliso a lounugotootogo ina melabenimi.